

**Originalni naučni rad**

UDK 616.711-007.43:616.711-009.7-08

DOI 10.7251/SVR2122025D

## **SPECIFIČNOSTI PSIHOLOŠKOG PROFILA PACIJENATA NAKON OPERACIJE DISKUS HERNIJE**

**Dijana Đurić<sup>1</sup>**

**Đorđe Čekrljija<sup>2</sup>**

**Apstrakt:** Biopsihosocijalni pristup u razumijevanju i liječenju bolesti razmatra kako biološke tako i psihološke i socijalne faktore značajne za nastanak i tok bolesti. Jedna od bolesti ili stanja kod kojih je povezanost sa psihičkim stanjima značajno izražena je diskus hernija. Diskus hernija se uglavnom liječi konzervativno a ukoliko terapija ne pomogne pristupa se operativnom zahvatu. Liječenje je obično dugotrajno i pacijenti su izloženi hroničnom bolu, promjenama u psihičkom i socijalnom funkcionisanju te kvalitetu života. Cilj istraživanja je bio da se utvrde eventuelne specifičnosti psihološkog profila za pacijente nakon operativnog zahvata diskus hernije primjenom MMPI 201 testa. Uzorak je činilo 109 pacijenata koji su imali operaciju kičme do šest mjeseci prije ispitivanja. Primjenjen je MMPI 201 (Minnesota Multiphasic Personality Inventory) psihološki test namijenjen za procjenu karakteristika ličnosti. Sadrži 8 skala kojima se procjenjuju psihopatološke karakteristike ličnosti i tri kontrolne skale (L, F, K) a na osnovu međuodnosa skala mogu se dobiti specifični profili za pojedina stanja ili poremećaje. Prema ukupnim nalazima, dobijeni muški i ženski profili na testu MMPI-201 kod pacijenata nakon operacije diskus hernije u svojim karakteristikama sadrže dovoljno specifičnosti da nisu svodivi niti na jedan postojeći profil. Ovaj nalaz ukazuje na moguću egzistenciju *tipičnog* profila koji bi opisivao akutne psihičke tendencije pacijenata nakon operacije diskus hernije i razlikovao ga od sistema trajnih i stabilnih dispozicija ličnosti te omogućio distinkciju između uobičajenih reaktivnih stanja karakterističnih za određene vrste zdravstvenih problema i somatskih poremećaja ličnosti.

**Ključne riječi:** *operacija diskus hernije, MMPI 201, psihološki profil.*

---

1 Zavod za fizikalnu medicinu i rehabilitaciju "Dr Miroslav Zotović"; dijanadj1706@gmail.com.

2 Univerzitet u Banjoj Luci, Filozofski fakultet; djopsi@gmail.com.

## UVOD

Biopsihosocijalni pristup u razumijevanju i liječenju bolesti u obzir uzima psihosomatske - uticaj psiholoških faktora na nastanak i tok bolesti i somatopsihičke faktore - utjecaja bolesti na psihički život. Svaka bolest ili oštećenje imaju svoj početak, dinamiku razvoja, i završetak u pravcu ozdravljenja, hroniciteta ili smrti. Između tih krajnosti postoji brojna stanja kod kojih je bolest ili trauma u određenoj mjeri oštetila neki organ ili narušila neku funkciju, što za posljedicu ima i otežano opšte svakodnevno funkcionisanje i utiče na psihička stanja pojedinca. Psihološkim procesima koji prate ova stanja se bavi somatopsihologija. Naziv somatopsihologija u literaturu uvode Barker, Wright i Gonick (1946) zbog potrebe za proučavanjem psiholoških stanja osoba sa invaliditetom čiji je broj povećan nakon rata, kao i za ispitivanjem psiholoških faktora i njihovog uticaja na tok i ishode rehabilitacije. Zbog toga se ponekad u literaturi ovo područje naziva i psihologija rehabilitacije. Međutim, somatopsihologija je mnogo širi pojam jer obuhvaća i psihičke reakcije i ponašanje pacijenata kroz različite bolesti (Havelka, 2002. ).

Jedna od bolesti ili stanja kod kojih je povezanost sa psihičkim stanjima značajno izražena je diskus hernija. Diskus hernija se uglavnom liječi konzervativno. Međutim ukoliko konzervativna terapija ne da rezultate pristupa se operativnom zahvatu. Preoperativno liječenje je obično dugotrajno i pacijenti su izloženi neugodnom, hroničnom bolu. Hronični bol se obično definiše kao bol koji traje duže od tri mjeseca (Turk i Okifuji, 2002) i uzrokuje, kako fizičku tako i mentalnu, patnju. Najčešće emocionalne reakcije na bol su anksioznost, strah, bijes, krivnja, frustracija i depresija. Takođe je opisan i hronični bolni sindrom, za koji su karakteristični: intenzivna bol i patnja, naglašene promjene u ponašanju, smanjena aktivnost, anksioznost, depresija, suicidalne ideje, socijalno povlačenje, razdražljivost, umor, kognitivne smetnje, smanjena seksualna aktivnost, beznađe, bespomoćnost i izbjegavajuće ponašanje (Braš i Gregurek, 2009). Anksioznost i briga su uobičajene emocije, budući da je bol neposredna prijetnja našoj dobrobiti (Barlow, 2004). Polatin i sur. (1993) pronašli su da 97% osoba s hroničnom bolju u donjem dijelu leđa na intenzivnoj rehabilitaciji ima dijagnozu somatoformnog poremećaja, koji je u svim slučajevima razvijen nakon pojave boli koja je bila povezana s ozljedom. U literaturi se navodi da je prevalencija ovog poremećaja čak i viša, odnosno da bi poremećaj boli, po definiciji, mogao biti prisutan kod gotovo svih stanja hronične boli.

S druge strane, i sam postoperativni tok je emocionalno uznemirujući, praćen neizvjesnošću, anksioznošću, strahom od ponavljanja čitavog procesa. Većina pacijenata, bez obzira na individualne razlike, pokazuje slične psihičke reakcije u toku trajanja bolesti, liječenja i rehabilitacije. Za bolje razumijevanje pacijenta i planiranje rehabilitacionog tretmana značajno je procijeniti intenzitet pojedinih reakcija i napraviti distinkciju da li se radi o prethodno prisutnom poremećaju koji se može negativno odraziti na tok i ishod rehabilitacije, uobičajenim reakcijama ili poremećaja koji izlaze van okvira uobičajenih reakcija i tendiraju ka razvoju poremećaja.

S obzirom da problem psihičkog funkcionisanja pacijenata nakon operacije diskus hernije nije značajnije izučavan, mišljenja smo da bi provjeren upitnik sa profilima i normama za veliki broj opštih i specifičnih uzoraka bio od koristi te smo primjenili Minnesota Multiphasic Personality Inventory - 201 (MMPI) koji je jedan od najčešće korištenih psiholoških instrumenata za ispitivanje strukture ličnosti iz domena psihopatologije (Pop Jordanova, 2015.). Prednost ovog testa je i u tome što su kroz istraživanja identifikovani tipični profili i norme za različite poremećaje, što značajno olakšava dijagnostičku procjenu.

Stoga je zadatak ovog rada da utvrđimo da li postoji profil koji je specifičan za pacijente nakon operativnog zahvata diskus hernije primjenom MMPI 201 testa, što bi olakšalo dijagnostičku procjenu i unaprijedilo razumijevanje ove grupe pacijenata.

## METOD

### *Uzorak i procedura*

U istraživanju je ispitano 117 pacijenata koji su se, nakon operacije diskus hernije nalazili na fizikalnoj rehabilitaciji u Zavodu za fizikalnu medicinu i rehabilitaciju „Dr Miroslav Zotović“ u Banjaluci. Vrijeme proteklo od operacije je 2-6 mjeseci. U analizi je obrađeno 109 pacijenata a 8 je isključeno jer je analiza kontrolnih skala pokazala nevalidne profile. Od 109 pacijenata 59 (54,1%) žene, 50 (45,9 %) muškarci. Starost ispitanika se kretala u rasponu 28 do 65 godina ( $M=56,46$ ,  $SD=8,49$ ). Učešće u istraživanju je bilo dobrovoljno. Nakon obavljenog intervjua, pacijentima je dato da popune MMPI – 201 upitnik (Biro, 1998). U analizi rezultata su razmatrani sumacioni skorovi na skalama upitnika MMPI-201. Pored toga, za svakog pacijenta je na osnovu dobijenih rezultata na skalamu, pretvorenih u T-vrijednosti, dobijen individualni profil a rezltati

su kasnije sabrani i obrada rezultata je izvršena na osnovu prosječnih vrijednosti.

*Instrumenti*


Minesota Multifazni Personalni Inventar verzija 201 (MMPI-201; Biro M, Berger J., 1988. je varijanta MMPI standardizovana za populaciju bivše Jugoslavije (6). Sadrži 201 tvrdnju, koje se procjenjuju s „tačno“ ili „netačno“. Tvrđnje su grupirane u 11 skala, a pojedini odgovori mogu biti indikativni za jednu ili više skala. Prve tri skale L, F i K su skale validnosti i služe za procjenu ispitanikove spremnosti za takvu vrstu ispitivanja. L skala održava rigidnost ili naivnost u pristupu testnom materijalu. F skala ukazuje na konfuzno mišljenje , razumijevanje materijala i ili prenaglašavanje sopstvene patologije. K skala ukazuje na odbrane, odnosno nespremnost za ispoljavanjem vlastitih karakteristika.

Kliničke skale su; Hs- hipohondrijaza koja procjenjuje preokupiranost zdravljem i zdravstvenim problemima, D - depresija za procjenu nivoa depresivnih simptoma, Hy- hysterija, potiskivanje i negacija konverzivnih simptoma te emocionalnost osobe, Pd - psihopatske devijacije, nezrelost i impulsivnost, Pa - skala paranoja, senzitivnost, hostilnost, nepovjerljivost, Pt - mjeri anksioznost, i tendenciju ka somatizacijama i ospsesivnost. Sc- shizofrenija, konfuzno i bizarno mišljenje. Ma - manija mjeri energiju, euforiju ili hiperaktivnost. Dijagnostička interpretacija se može zasnivati na analizi pojedinačnih skala, međutim, među kliničarima se najčešće koristi analiza profila zasnovana na međuodnosu pojedinih skala.


**РЕЗУЛТАТИ**

Obrada rezultata je provedena na osnovu prosječnih skorova dobijenih na testu MMPI-201 koje su pretvorene u T vrijednosti koje se razlikuju za muškarce i žene te su napravljeni i odvojeni profili. Rezultati dobijeni na našem uzorku su prikazani na graficima 1 i 2.

Grafik 1: Psihološki MMPI- 201 profil za muški poduzorak



Grafik 2: Psihološki MMPI-201 profil za ženski poduzorak



Analiza dobijenih rezultata pokazuje da kod obje grupe ispitanika ni jedna vrijednost ne prelazi skor T=70. Profili dobijeni na skalamama L, F i K su relativno ujednačeni. Kod obe grupe su najizraženiji skorovi na skali Histerije (Hy), što indikuju sklonost korištenju mehanizama odbrane potiskivanja i negacije, i prisustvo konverzivnih simptoma. Kod muškaraca su podjednako visoki i skorovi na skali depresije (D). Istovremeno i kod žena i muškaraca je najizraženije sniženje na skali Psihopatskih devijacija (Pd) koje ukazuju na nezrelost i impulsivnost te

asocijalno ponašanje. Najuočljivija razlika između muškaraca i žena se primjećuje na skali Hipohndrijaze (Hs) gdje žene u prosjeku ostvaruju više skorove, psihopatskih devijacija (Pd) i kontrolnoj K skali koja mjeri tendenciju nespremnosti za ispoljavanje sopstvenih karakteristika. Ženski poduzorak u prvom redu karakteriše izraženo sniženje na kontrolnoj (K) skali i blago povišenja na Pa skali koji ukazuje na nešto višu senzitivnost i hostilnost.

Gledano u cjelini, rezultati za oba polna poduzorka su interpretabilni i odgovaraju očekivanim psihičkim reakcijama kakve se registruju nakon sličnih operativnih zahvata.

## **DISKUSIJA**

Naše istraživanje je provedeno sa ciljem da se upitnikom MMPI-201 identificuje specifičan profil za pacijente koji su imali operativni zahvat kičme zbog hernije diska. Uprkos većoj frekvenciji pojedinih odgovora i povišenju na pojedinim skalama, analiza profila pokazuje na niti jedna skala ne prelazi T skor 70, što predstavlja kriterij da bismo mogli govoriti o prisustvu određenog poremećaja, međutim, u opisu rezultata smo ko povišene uzeli skale čiji prosječni skorovi prelaze T skor 60. S druge strane kod muškaraca je evidentirano prisustvo većeg broja depresivnih simptoma u odnosu na žene. U obe grupe ispitanika prisutno je povišenje skale, histerije, odnosno potiskivanja i negacije konverzivnih simptoma

I kod žena i kod muškaraca je najizraženije sniženje na skali psihopatskih devijacija (Pd), koja se odnosi na nezrelost i impulsivnost te asocijalno ponašanje. Kod muških ispitanika je niža i hipohondrijaza koja predstavlja okupiranost tjelesnim simptomima, međutim ove skale su veoma blizu prosječnim vrijednostima.

Prema ukupnim nalazima, dobijeni muški i ženski profil u svojim karakteristikama sadrže dovoljno specifičnosti da nisu svodivi niti na jedan postojeći profil definisan u MMPI priručnicima. Međutim, pokazuju da su i kod ove grupe pacijenata prisutne sličnosti i razlike u odnosu na druge, manje ili više srodne kliničke uzorke; dijabetes mellitus, cistična fibroza, osobe koje idu na dijalizu (Pop Jordanova, 2015.).

Ljekari i ostalo osoblje koje radi sa ovim pacijentima često opažaju da su pacijenti depresivni, anksiozni, fokusirani na bol, što se može pogrešno interpretirati kao trajnu crtlu ličnosti. Pacijenti se počinju doživljavati napornim, nemotivisanim ili izmjenjenim, što kod osoblja može izazvati negativne reakcije i predstavljati otežavajući faktor u procesu rehabilitacije.

Psihološka procjena i rezultati primjenjenih testova mogu potvrditi prisustvo depresije, hipohondrijaze ili konverzivne simptomatologije. Međutim, kad se obrati pažnja na odgovore na pojedinačna pitanja, na koja pozitivni odgovori mogu ukazivati na psihopatološke tendencije, može se vidjeti da su pojedini odgovori uzrokovani objektivnim okolnostima. Stavke: „Fizički sam zdrav kao i većina mojih prijatelja, čini mi se da me niko ne razumije, Često sam zabrinut za svoje zdravlje često mi se trzaju mišići, u pojedinim dijelovima tijela češće osjećam žmarce, gorenje, peckanje ili utrnutost; Kada se ne osjećam najbolje obično nisam ni za šta“ su primjeri tvrdnji na koje pacijenti pozitivno odgovaraju a koji su direktna posljedica trenutnog stanja, intenziteta bola koji se trpi i neizvjesnosti o promjeni na bolje. U prilog ovom tumačenju vrlo snažno govori primjer iz ličnog iskustva, gdje je jedan pacijent na tvrdnju „*Pazim da u hodu ne stanem na pukotine u pločniku*“ dao pozitivan odgovor i spontano dodao: „Pa moram, jer ako iskrivim nogu ili zapnem, zaboli me“.

Ovi nalazi mogu pomoći boljem razumijevanju reakcija i ponašanja pacijenta nakon operacije kičme. Vrlo često se kod ovih pacijenata, u toku konzervativnog a i post operativnog liječenja govori o prisustvu somatoformnih bolnih poremećaja (F45.4) i sindrom ličnosti s hroničnom boli (F62.8). ili neku iz spektra opisuje kroz kategoriju poremećaja boli prema (DSM-IV). Problem u ovim slučajevima je što se za nastanak, ozbiljnost, pogoršanje ili održavanje fizičke boli uzimaju odgovornim psihološki faktori. Međutim, naglasak na psihološke faktore zanemaruje prisustvo objektivnih problema koji su kod ovih pacijenata evidentni. Zbog toga je kod ovih pacijenata primjenjivija kategorija “Poremećaj somatskih simptoma” koja je uvedena u DSM-5 (2014), kojim se procjenjuje sposobnost adaptiranja ljudi s hroničnim sindromima. Iako ova kategorija omogućuje objektivniji, a mogli bismo reći i pravedniji pristup ovim pacijentima, ostaje činjenica da je efikasna adaptacija na bol visoko individualizirani proces u koji su uključeni brojni faktori. Zbog toga ostaje pitanje možemo li jasno definisati granice u kojima se određena ponašanja i reakcije mogu smatrati “normalnim” a gdje prelaze u poremećaj. Smatramo da rezultati ovog rada kroz utvrđivanje tipičnih profila na MMPI testu mogu pridonijeti boljem razumijevanju ovog pitanja i definisanju uobičajenih reaktivnih stanja kod osoba koje se nalaze na rehabilitaciji nakon operacije diskus hernije.

**ZAKLJUČAK**

Prema ukupnim nalazima, dobijeni muški i ženski profil na testu MMPI-201 kod pacijenata nakon operacije diskus hernije u svojim karakteristikama sadrže dovoljno specifičnosti da nisu svodivi niti na jedan postojeći profil. Ovaj nalaz ukazuje na moguća egzistencija *tipičnog* profila koji bi opisivao *akutne* psihičke i psihopatološke tendencije pacijenata nakon sličnih operativnih zahvata i razlikovao ga od sistema trajnih i stabilnih dispozicija ličnosti te omogućio distinkciju između uobičajenih reaktivnih stanja karakterističnih za određene vrste zdravstvenih problema i somatskih poremećaja ličnosti.

**THE SPECIFICS OF PSYCHOLOGICAL PROFILE  
OF PATIENTS AFTER DISCUS HERNIA SURGERY**

**Dijana Đurić<sup>3</sup>**  
**Đorđe Čekrlija**

**Abstract:** The biopsychosocial approach in understanding and treating disease considers both biological and psychological and social factors important for the onset and course of the disease. One of the diseases or conditions in which the connection with mental states is significantly expressed is disc herniation. Disc herniation is usually treated conservatively and if the therapy does not help, surgery is performed. Treatment is usually long-term and patients are exposed to chronic pain, changes in mental and social functioning, and quality of life. The aim of the study was to determine the possible specifics of the psychological profile for patients after disc herniation surgery using the MMPI 201 test. The sample consisted of 109 patients who had spinal surgery up to six months before the study. MMPI 201 (Minnesota Multiphasic Personality Inventory) psychological test designed to assess personality characteristics, was applied. It contains 8 scales that assess the psychopathological characteristics of the personality and three control scales (L, F, K). Based on the interrelationship of the scales, specific profiles for individual conditions or disorders can be obtained. According to the overall findings, the male and female profiles obtained on the MMPI-201 test in patients after disc herniation surgery contain enough specificity in their characteristics that they are not reducible to any existing profile. This finding indicates the possible existence of a typical profile that would describe the acute psychological tendencies of patients after disc herniation surgery and distinguish it from the system of permanent and stable personality dispositions and enable the distinction between common reactive conditions characteristic of certain types of health problems and somatic personality disorders.

**Keywords:** *discus hernia surgery, MMPI 201, psychological profile..*

---

<sup>3</sup> dijanadj1706@gmail.com

**LITERATURA:**

1. Američka psihijatrijska asocijacija (2014). Dijagnostički i statistički priručnik za duševne poremećaje, peto izdanje. Jastrebarsko: Naklada Slap.
2. Barker, R. G., Wright, B. A. and Gonick, M. R. (1946). Adjustment to physical handicap and illness: *A survey of the social psychology of physique and disability*. New York: Social Scientific Research Council. Bulletin 55, pp. 372.
3. Barlow, D. H. (2004). Anxiety and its Disorders: *The Nature and Treatment of Anxiety and Panic*. New York: Guilford Press.
4. Biro M., Berger J. (1988). *Praktikum za primenu i interpretaciju MMPI*. Beograd: Savez društava psihologa Srbije.
5. Block AR, Gatchel RJ, Deardorff WW, Guyer RD (2003) *The psychology of spine surgery*. Washington: American Psychological Association.
6. Braš, M., i Gregurek, R. (2009). Chronic pain-psychological aspects and psychopharmacotherapy. *Medix*, 83, 121-128.
7. Havelka, M. (Ur.) (2002). *Zdravstvena psihologija*. Jastrebarsko: Naklada „Slap“.
8. Polatin, P. B., Kinney, R. K., Gatchel, R. J., Lillo, E., Mayer, T. G. (1993). Psychiatric illness and chronic low-back pain. The mind and the spine—which goes first? *Spine*. 18: 66–71.
9. Pop-Jordanova N. (2015). MMPI for personality Characteristics of patients with different Diseases, ПРИЛОЗИ, Одд. мед. науки, XXXVI 1, МАНУ CONTRIBUTIONS. Sec. Med. Sci., XXXVI 1, str 153-164.
10. Turk, D. C., i Okifuji, A. (2002). Psychological factors in chronic pain: evolution and revolution: *Journal of consulting and clinical psychology*. 70 (3), 678-90.